

# Dialog el center dallas activitads

Radunonza generala dils possessurs da secundas habitaziuns da Tujetsch a Sedrun

DA HANS HUONDER / ANR

■ Il dialog culs representants dalla vischnaunca da Tujetsch, dallas pendicularas e da Sedrun Mustér Turissem resta la finamira principala dalla Cuminonza dils possessurs da secundas habitaziuns da Tujetsch. Persuenter survescha denter auter la scuntrada ch'ha danovamein liug questa stad.

Sco quei che la presidenta dalla cuminonza, l'antierura cussegliera naziunala Vreni Müller-Hemmi, ha saviu comunicar la sonda suentermezdi alla radunonza generala ell'aula dalla casa da scola a Sedrun ha quella scuntrada liug ils 4 d'ost 2018. Igl ei previu in viadi a Mustér/Caischavedra, cumbinaus cun informaziuns davart la pendiculara nova da Sedrun el territori da skis da Mustér. Da niev ella suprastanza dalla cuminonza entra Margrit Weber-Scherrer da Zufikon che posseda dapi sis onns ina habitaziun secundara a Rueras. L'advocata e mediatra remplazza Daniel Krähenbühl ch'ei seretratgs. La suprastanza dalla cuminonza ei danovamein sefatschentada dallas taxas da turissem e da hosps dalla vischnaunca da Tujetsch, mo era da Mustér. Tenor il suprastont Kurt Baumgartner spetga la cuminonza ina strategia communabla unita da tuts pertuccai per aschia impedir lavur dubla ed inefficienza el diever dils daners. Totalmeins stat a disposiziun allas vischnauncas ed a Sedrun Mustér Turissem per lur intents ina summa da 2,7 milliuns francs ord taxas da turissem e hosps. «El rom dalla purschida dalla carta gratuita retscheivan ils possessurs da secundas habitaziuns anavos pli u meins quei ch'els pagan», constatescha Baumgartner. Era il proxim onn duei il dialog cun la vischnaunca, las pendicularas e Sedrun Mustér Turissem vegnir cuntinuas. Tenor Müller-Hemmi, mo era il president communal da Tujetsch, Beat Röschlin, s'extracta ei d'in bien dialog denter partenaris cun la finamira d'anflar consens.



Edi e Silvia Hess – cheu en acziun cun carr e cavagl – han obteniu igl prem «Cardun d'argien» dalla Cuminonza dils possessurs da secundas habitaziuns da Tujetsch. Lur menaschi puril ei buca mo multifars, mobein era ecologics ed aviarts per la publicitad. Quei premi ei vegnius surdaus uonn per l'emprema ga, en dus onns duei il secund suandar. Cun quel vul la cuminonza promover engaschaments specials ed ideas particularas en Val Tujetsch.

FOTO H. HUONDER

## Vinavon grondas investiziuns

Il CEO dall'Andermatt Sedrun Sport SA, Silvio Schmid, ha orientau las commembras ed ils commembers davart ils projects el territori da skis. «Da Nadal vegn il territori da skis dad Andermatt sil Schneehühnerstock ed engiu entochen Dieni ad esser semtgau», di Schmid. Era questa stad investeschan las pendicularas rondund 30 milliuns francs. Denter auter era – e quei era buca previu – en in restaurant sil Schneehühnerstock. Dapresent ein las pendicularas en contractivas cun la Viafier Matterhorn Gottard concernent la contribuziun ch'ellas pagan per ch'els

skiuons sappien far diever dalla viafier. Tenor Schmid s'extracta ei d'ina summa considerabla. Il president communal Beat Röschlin ha orientau denter auter davart la sanaziun dalla staziun dalla viafier, respectivamein il passadi niev per Salins e Valtgeva. In tal seigi d'impurtonza pil traffic da pedunzs e skiuons che fetschien diever dil traffic public. In'orientaziun ha ei era dau davart dil Bogn Sedrun. Tenor Renato Decurtins ei il project seretardaus empauet, aschia che la sanaziun vegn fatta – aschilunsch ch'ella vegn approbada – igl onn 2020. En discussiun ei era in augment dalla purschida.

## In onn cun bia lavur

La presidenta dalla Cuminonza dils possessurs da secundas habitaziuns da Tujetsch, Vreni Müller-Hemmi, ha rapportau detagliadamein dil curriu e passau igl onn 2017. Quei onn ei staus sut il motto «rinforzar il fundament – extender il dialog – mussar preschientscha». Il dialog ei vegnius tgraus el rom da sentupadas cun representants dalla vischnaunca da Tujetsch, da Sedrun Mustér Turissem e dallas Pendicularas da sport Andermatt Sedrun. Per promover la sentupada da possessurs da secundas habitaziuns ed indigens giavischa la

cuminonza egl avegnir ina scuntrada da stad. Igl onn vargau ha la suprastanza communal purschiu quella sentupada en connex cun l'avertura dalla nova halla plurivalenta. Sil sector dil turissem pretenda la cuminonza d'interess ina strategia turistica unita dallas organizaziuns da turissem dad Andermatt, Sedrun e Mustér e quei cun ina clara struttura da responsabladad. Mo aschia sappien ils daners a disposiziun vegnir impundi efficientamein e cun claras finamiras.

## Cooperaziun sin plaun cantunal

Representants dalla Cuminonza dils possessurs da secundas habitaziuns da Tujetsch ein separticipai a duas radunonzas dallas 13 cuminonzas dil medem intent dil Grischun. Tenor Müller-Hemmi ha la collaboraziun da quella cuminonza cattau in grond resun ellas medias. Allas commembras ed als commembers ei vegniu dau la pusseivladad da separticipar ad ina retscherca online dil Forum economic Grischun davart quei che fetschenta ils possessurs da secundas habitaziuns el cantun Grischun. Ils resultats publicai sin la homepage dalla cuminonza lubeschan da trent entginas conclusiuns davart ils basegns. «La partenza per ina stretga cooperaziun sin plaun cantunal ei reussida», constatescha la presidenta en siu rapport annual extendiu. Regularmeins ha la suprastanza dalla Cuminonza dils possessurs da secundas habitaziuns da Tujetsch orientau las commembras ed ils commembers davart sias activitads igl onn vargau.

Enteifer la suprastanza ei era la successiun al tgamun dalla cuminonza stada in tema. Essend che plirs commembers dalla suprastanza intendan da sereter vegn ei ad esser necessari da tscherchar nova glied. Ins vul far pass per pass per aschia impedir in vacuum. La cuminonza ei carschida igl onn vargau per 18 ulteriurs commembers sin totalmeins 318.

# Ils Europès ein anavos

Flem Laax Falera Turissem tra bilanza e mira anavon

■ (anr/abc) All'entschatta dalla stagiun da stad ha l'organizaziun turistica envidau ad ina bilanza dalla stagiun vargada cun perspectivas silla stagiun currenta. La megliera nova ei ch'els hosps europès tuornan puspei. La situaziun fuva empau desperada. Il november vargau ha la branscha turistica denton strusch giu peda da selamentar e tugnar ch'ei bischi buc. Igl unviern ha buca schau spitgar, el ei staus pli ch'i-deals pils territoris da skis. Suenter diesch onns maghers cun pli e pli paucas frequenzas ha in unviern cun neiv en abundanza puspei dau ina vuilta alla morala.

## Bus niev

### Sagogn-Valendau-Imschlacht

Il directur da Flem Laax Falera Turissem SA, André Gisler, ha giu raschun da tarlischar sco in marenghin tiel beinvegni alla sentupada d'informaziun avon la stagiun da stad. Igl prem ha el tratg ina bilanza ordvart positiva dallas frequenzas dalla stagiun vargada. La stagiun 2017/18 han ins dumbrau bunamein 950 000 entradas el territori da skis. La stagiun 2011/2012 havev'ins finiu cun 798 000 frequenzas, ils onns suandonts era ei iu mo pli engiu. Il segl anavon ha schau selegrar era il directur dalla gastronomia dallas pendicularas. Christoph Schmidt ha menziunau la stagiun vargada sco fenomenala, ins hagi registrau in augment da 5,6 pertschien.

Quei che detti en egl seigi ch'els Europès tuornien puspei, ils Svizzers seigien denton aunc adina la cumpart gronda dalla petta cun 60 pertschien. Il secuntener da viagiare e da far vacanzas sigl entir

mund seigi vidlunder da setransformar, ins stoppi seconfruntar cun quei fatg e s'adattar.

La fiera dalla stad ei daventada aunc pli dira damai ch'els carstgauns preferes-

schan oravontut da visitar ils marcaus e las metropolas. La collaboratura dil marketing online, Eliane Bernasocchi-Volken, ed il referendari dalla Arena tectonica Sardona, Patric Collet, sco era

il referendari pils products dalla stad, Jascha Schmid, han informau dallas attraziuns ch'ei semtgadas. Denter auter han ins renovau la pista da velos digl Ault la Runca a Flem. Era dat ei ina nova colligiaziun per viandonts naven da Sagogn tochen sigl uclau da Brins/Brün sur Valendau. In bus pign, indicau officialmeins egl urari da posta, vegn a pendular regularmeins quater gadas a gi sur il Rein da Sagogn-Valendau-Brins/Brün e vinavon tochen sil punct panoramic Imschlacht. Da leu san ils viandonts ir a pei sur il Tenner Chrüz a Tenna e culla posta il viadi anavos. Collet ha raquintau tgei ch'ei previu per festivar il giubileum da diesch onns dapi che l'Arena tectonica Sardona ei recepida el patrimoni mundial dall'Unesco dallas cuntradas da muntada mundiala.

Denter auter dat ei ils 8 d'ost ina installaziun gigantica cun ina slackline dad in kilometer el Plaun Segnas Sut. Lu dat ei in'exposiziun, in'audiziun che tematisescha la perscrutaziun geologica dapi 250 onns. In'ulteriura attraziun per promover l'Arena tectonica ei il song «Sardona» dil Songaglies Marius Tschirky. Conradin Klais conta la versiun romontscha e Betty Legler representa il cantun Glaruna. Il song san ins cargar giu sut [www.unesco-sardona.ch](http://www.unesco-sardona.ch). Ils scollars da Trin han cooperau el chor d'affons e contan la versiun romontscha.



Els selegran silla stagiun da stad da Flem-Laax-Falera: Patric Collet, Eliane Bernasocchi-Volken, André Gisler (da sen.).

FOTO A. BEELI